









REGIAM  
DIGNITATEM

AB

ELECTORE  
BRANDENBUR-  
GICO

In Prussia nuper assum-  
tam nihil in se habere, quod Juribus Regni  
Poloniæ Pactisque inter Illud & Domum  
Brandenburgicam olim initis

*J. P. Capuinior Convent* repugnet, *Gleperis*

Aut Regi & Reipublicæ Poloniæ fraudi  
& detrimento esse possit.

---

Anno M D C C I.



REGIAM  
DIGNITATEM

AB

ELECTORE  
BRANDENBUR-



915141 III  
Mag. St. Dr.

Mag. St. Dr.

Anno M D C C L

Bibl. Jag.  
St. Dr. 1986 K 410/22(39)





Ama fert, imò ex Scriptis publicè editis constat, esse nonnullos in Ser.<sup>ma</sup> Republ. Polona, qui Regium titulum, quò non ita pridem Serenissimus Elector Brandenburgicus insignitus est, ita interpretantur, ac si inde detrimenti aliquid ad Inclytam Rempubl. redundare possit. Qui error, cum arctissimum illud amicitiae, conjunctionis ac vicinitatis vinculum, æterno foedere utramq; inter Gentem constrictum, labefactare aliquo modo posset, ut ex omnium animis funditus evellatur, paucis, sed solidè demonstrabitur:

Adsumptionem istam Regiae dignitatis.

Neque contra æternum Velaviense ac Bydgosciense Foedus per Pacem Olivensem corroboratum, neque contra amicitiam ac conjunctionem in Eodem utrinque stabilitam.

Neque contra Jura & Interesse, ut vocant, Inclytae Reipubl. ullo modo esse, quin potius Ejusdem quàm maximè interesse, ut Ser.<sup>ma</sup> Respubl. Principem æterno foedere junctum, ad exemplum Imperatoris ac aliorum plerorumque Regum, Principum ac Rerumpubl. Regem, quod sine ullo suo detrimento facere possit, imò ut faciat ex legibus foederis, quò alter alterius honorem ac commodum quærere tenetur, obstricta sit agnoscat.

Vix credibile videri meritò debet, esse quenquam Status Europæ publici adeò rudem, quem fugiat, qua ratione Domus Electoralis Brandenburgica per Pacta, quæ primum A. 1657. Velaviae inita deinceps Bydgosciae ratihabita & non multò post Olivæ in celebri isto Pacis Tractatu corroborata, summi & absoluti Imperii jura, in illam, quam possidet Prussiae partem, consecuta, iisque ex eo tempore, nemine turbante aut contradicente, usa sit, eademque hodiernum quietè exerceat. Quoniam tamen nonnulli non dubitare, summum illud Domus Brandenburgicae in certam Prussiae Partem Dominium, potestatemque à nemine dependentem publicè oppugnare atque adeò affirmare:

**I**llam partem Prussiae, quam Domus Brandenburgica possidet, esse Reipubl. Dominium  
A &



& Hæreditatem, Electoremque Brandenburgicum Dignitatem Regalem super istas Prussiae Terras non potuisse sine insigni in Rempubl. Poloniae injuriâ sibi circumdare, necessarium est istum errorem inconcussis rationibus evertere:

Inficias equidem non iverim, istam ipsam, de qua nunc disquiritur Prussiae partem, olim, ex eo tempore, quo Albertus Marchio Brandenburgicus armorum vi constrictus, & à Domino feudi, quem hætenus agnoverat, Imperatore scilicet ac Imperio destitutus, eandem à Regno Poloniae in feudum recognoscere fuit adactus, usque ad Fridericum Wilhelmum Electorem Brandenburgicum, fuisse feudum Regni Poloniae.

Facile etiam id conceditur, si illis temporibus, & durante adhuc Vasallagio Polonico, Ducibus Prussiae visum fuisset, Regium Titulum sibi assumere, quod quidem fortè nihil absurdi habiturum fuisset, certè exemplis non careret, siquidem & alii per Europam Reges numerantur, quorum Regna feudorum indolem habent & ab aliis Principibus clientelari jure conferuntur, id quod exempla Regnorum Neapolis, Siciliae & Bohemiae comprobant, Non potuisse tamen istius mutationis consilium haberi ratum, nisi Rex & Respublica Poloniae id suo consensu atque calculo firmassent.

Verum enim verò Prussia Brandenburgica inde ab Anno 1657. diversam prorsus à priori faciem, naturamque induit. Illo enim Anno Rex, Johannes Casimirus, qui tum in Polonia rerum potiebatur, tam suo quam successorum nomine, suffragante ac plenè approbante Republica Poloniae, Fridericum Wilhelmum, Electorem Brandenburgicum, omnesque Ejus Descendentes, Successores Masculos, per pacta solennia ac aeterna, quibus tum temporis Reipubl. redintegratio salus ac securitas restabilita & quorum firmitatem inviolabilem diversi, iique maximæ per Europam autoritatis Principes suscepere tuendam Vasallagii Jurisque feudalis vinculo, quo Elector, modo dictus, ac Ipsius Antecessores, à tempore primi Ducis Alberti, Poloniae fuerant obstricti, penitus exsolvit atque liberavit, eisque universis ac singulis pro Dominis ac Principibus Prussiae Brandenburgicae summis declaratis, Potestatem absolutam neminique mortalium ullâ ratione obnoxiam tradidit.

Eâ de re ne cuiquam ullus supersit scrupulus, verba pactorum Velaviae Anno jam indicato 1657. constitutorum hic subnectimus, quibus ea, quæ diximus, liquidò docentur, formulis quæ jam sequuntur:

ART.



## ART. V.

**Q**Vorum intuitu, & aliorum præsertim infrà specificatorum, & aliis justis de causis, Ducatum Prussiae, iis finibus circumscriptum, quibus Serenissimus Elector illum olim jure feudali, ante hoc bellum exortum possidebat, Ipse deinceps & Descendentes Ejusdem Masculi, ex thorò Ejus legitimè procreati, indeque Descendentes omnes, donec quisquam supererit ex Descendentibus Masculis S.<sup>a</sup> Ser.<sup>nis</sup> El.<sup>lis</sup>, jure supremi Domini, cum summâ absolutaque potestate sibi habebunt, possidebunt, regentque absque omnibus antebâc præstitis oneribus.

De Pactorum jam allegatorum validitate ac vi obligandi, & quod eadem inter Regnum Poloniae, Domumque Brandenburgicam Lex sint Sacrosancta, inviolabilis ac æterna, quodque nisi fœderis aperti fracti, violatque opprobrium ac notam temerè quis velit subire, in istorum fraudem nihil agi, iisve contradici, nec quicquam illorum, quæ in iis stipulata sunt atque promissa, in dubium vocari debeat, nemini, qui circumstantias sequentes expendere voluerit, ulla dubitandi relinquetur causa.

### I.

Fœdus istud cum summæ absolutæque in Prussiam Brandenburgicam potestatis concessione, quæ eodem fœdere comprehensa est, non desultoria tractatione, aut sine gravissimis sufficientibusque rationibus, sed quæ ipsorum pactorum verba sunt, ideò à Regno Poloniae decretum fuit atque initum, quod Deo clementer annuente Serenissimus Elector Brandenburgensis ad sinceram pacem & amicitiam, cum Serenissimo Rege ac Regno Poloniae & Magno Ducatu Lithvaniae, à quibus violento bellorum ingruentium ac necessitatis inevitabilis impulsu, invitus avulsus fuerat, feliciter redierit,  
ac



ac perpetuo fœdere ita se Serenissimo Regno Poloniae & Magno Ducatui Lithvaniae conjunxerit, ut mutuam utilitatem, commodum ac securitatem sincerè procurare ac promovere teneatur. Quod porrò Serenissimus Rex ac Inclita Respublica probè perpenderint, tum pericula, quæ suæ Serenitati Electorali Terrisque Ipsius per ipsam separationem à partibus hostilibus imminebant, tum quanti intersit Regis ac Reipublicæ vicinum Principem justis devincire modis, tum imprimis, quanta quamque utilia Regi, Regnoque Poloniae per effectivam & actualem armorum conjunctionem præstare sua Serenitas Electoralis deinceps possit, tam belli quam pacis tempore.

## II.

Etiam hanc ob causam Pacta hæc eò sanctiora, eoque firmitus obligantia habenda sunt, quod ea non isto tantum tempore, quo sancita fuere, à Rege Poloniae & Senatoribus Ei assistentibus, sed à sequentibus quoque Regibus, Michaelē, Joannē & nunc Regnante Augusto, quando auspicia Regni primitus iniverunt, per Commissarios ex Ordine Senatorio & Equestri, mandatis ad eam rem necessariis instructos, juramento corporali in animam Regum, qui Ipsis hujus rei facultatem dederant, præstito sunt roborata; imò in Comitibus Reipubl. generalibus A. 1658. habitis, re in Conventibus particularibus ante proposita, deliberataque, nullo planè ex Regni Ordinibus repugnante, protestante aut contradicente, sed omnibus unanimiter consentientibus, lege publica approbata & confirmata.

## III.

Tabulis etiam publicis inserta.

## IV.

Insecutis dein Anno 1660. Pactis, Olivenſibus repetita. Nec minus.

## V.

Ordines Prussiae Brandeburgicae non solum Pactorum Olivenſium Articulo VII. hisce verbis: *Sua Regia Majestas atque Respu-*



*Respublica Poloniae hoc ipso exsolvunt Status Officiales, omnesque Prussiae Ducalis subditos priori juramento, quo hactenus illis obstricti fuerunt.*

Sed postea quoque per Commissarios Anno 1663. à Rege & Republica Regiomontem missos, à dependentia & jurejurando, quibus eo usque Regi & Regno Poloniae, ceu Domino suo directo, devincti fuerant, exsoluti, atque cum plenaria subjectione ad Domum Electoralem Brandenburgicam, quamdiu quisquam ex Friderici Wilhelmi Descendentibus Masculis reliquus fuerit, remissi sunt,

*Qua occasione*

## VI.

Nova formula Homagii, quod Ordines Prussiae Brandenburgicae

(1.) Principi suo Supremo & Territorii Domino &

(2.) In eventum saltem caducitatis Regi ac Regno Poloniae praestarent, introducta & recepta fuit. Et Principi quidem ac Domino sub Supremo Electori nimirum Brandenburgico, quovis tempore successuro Status jubebantur sequenti jurejurando se obstringere:

**E**Go N. promitto atque juro, me Serenissimo Principi ac Domino, Domino Friderico Wilhelmo, Marchioni Brandenburgico, Sacri Romani Imperii Archi-Camerario & Electori, tot. tit. Electori atq; Domino meo Clementissimo, suaeque Serenitatis Successoribus, juxta tenorem Pactorum Velaviensium, ceu soli, legitimo & immediato meo Hæreditario ac Supremo, Duci Prussiae fidem ac obedientiam praestitutum, Suaeq; Serenitatis Electoralis Ejusque Hæredum salutem & commoda promoturum, Ejusdemq; ac Ipsius Terrarum ac subditorum detrimenta ac incommoda pro virili mea parte & quantum in me situm est, anteversum, præmonitum ac submotum, sicuti fidelem, probumq; subditum decet: meq; nulla prorsus re, quamcunq; humani vis ingenii cogitando reperire queat, ab hoc animo abductum aut impeditum iri, omnia fideliter & sine dolo, ita me Deus adjuvet per Jesum Christum!



Regno vero Poloniae hac Jurisjurandi formula Ordines Prussici  
jussi sunt se obstringere:

**E**GO N. juro etiam quod existente casu, quo Suae Se-  
renitatis Electoralis Haeredes, ex Ipsius sanguine  
procreati, non amplius futuri sint, adeoque tunc possessio  
Ducatus Prussiae ad Suam Regiam Majestatem & Re-  
gnum Poloniae redierit, Ego tunc ET NON CITIUS  
juxta tenorem Tractatum inter Suam Regiam Maje-  
statem & Serenitatem Electoralem die 19. Septemb. 1657.  
initorum, Regiam Majestatem, Regesque successuros &  
Rempublicam Poloniae pro solis, legitimis & immediatis  
Dominis meis per inde ac reliqui Regni Indigenae,  
agnoscam. Ita me Deus adjuvet.

Qui utramque hanc jurisjurandi formam inter se conferre vo-  
luerit, facile in hac duo Capita Nobis cum consentiet:

(1.) Vi istius jurisjurandi praesenti hoc tempore, & quamdiu  
Electoris Friderici Wilhelmi Posteritas durabit, Eam solam summum  
Dominum Prussiae Brandenburgicae esse, &

(2.) Indigenas Prussiae Brandenburgicae tunc demum, quando  
Electoris Friderici Wilhelmi Descendentes masculi desinent, neque  
id citius, Regnum Poloniae pro Domino suo debere agnoscere;  
Quamdiu vero quisquam istorum Descendentium superfuturus est,  
Dominium, quod Regnum Poloniae in Prussia Brandenburgicam  
olim cum nexus feudalis adhuc duraret habuit, sublatum aboli-  
tumque esse.

Monendum hic simul est, ista jurajuranda non à sola Aula Bran-  
deburgica propria autoritate, & clanculum ita concepta ac formata,  
aut clam absque rescitu Regni Poloniae praestita esse; Minime id  
quidem, sed mutatio ista facta est, & juramenta dicta jam ratione  
sunt praestita, consentientibus, approbantibus ac praesentibus Com-  
missariis, ad istum Homagii actum à Rege & Republica delegatis,  
fueruntque hi Commissarii in primo, quod post obtentam supre-  
mam potestatem An 1663. Electori Friderico Wilhelmo praestitum est  
Homagio Dominus Johannes Stephanus Wyzga, Episcopus War-  
miensis, & Dominus Johannes Comes in Lefzno Lefzczynski, Pro-Can-  
cellarius Regni, & in secundo quod post mortem Patris Filio Fride-  
rico An. 1690. tum Electori, nunc Regi praestabatur, Dominus Hiero-  
nymus Lubomirski, S.R.I. Princeps Curiae Regni Marefchallus, & Do-  
minus Stanislaus Szczuka, Referendarius Regni. Quo-



Quomodo ergo rebus his comparatis, ullo argumento probabili dici potest, Prussiam Brandeburgicam etiamnum esse Reipublicæ Polonæ Dominium & Hæreditatem? Ejusve Proprietatem ac Dominium directum ad Rempublicam Poloniæ pertinere? Vel hanc Prussiæ partem (ut non nemo loquitur) ex sola tantummodo benevolentia Domui Brandeburgicæ hætenus esse permisam?

Diversi planè tenoris est Articulus V. Pactorum Velavienſium jam supra insinuatus, qui expressum discrimen instituit inter jura illa, quæ Domui Brandeburgicæ olim in Prussiam competeabant, & ista quibus vi istorum Tractatum ex eo tempore & deinceps gaudere debet.

Quæ olim in Prussiam habuit Domus Brandeburgica jura hisce verbis indicantur:

*Ducatum Prusiæ quem Serenissimus Elector olim jure feudi possidebat.*

Illæ verò jura, quibus ex eo tempore ac porro Domus Brandeburgica in Prussiam frui debet, sequenti modo sunt expressa:

*Ipse deinceps & Descendentes Ejusdem Masculi omnes, donec quisquam supererit, Jure Supremi Domini cum Summa absolutaque potestate sibi habebunt, possidebunt, regentque absque omnibus antehac præstitis oneribus.*

Concessâ igitur atque traditâ Domui Brandeburgicæ per pacta æterna jam sæpius memorata hæc in Prussiam Brandeburgicam potestate ac Dominio, nullâ prorsus ratione feudalitas ac dependentia, qua ista Prusiæ pars Poloniæ adhuc innexa dicitur, cum ea conciliari, nec verba reperiri possint, quæ clariùs istis ipsis doceant, Dependentiam istam ac Feudalitatem veterem, quamdiu Electoris Fridrici Wilhelmi Descendentes Masculi adhuc supersunt, sublatam, extinctam atque abolitam esse, &c. Quoniam de Domo Brandeburgica in Articulo, cujus aliquoties jam mentio facta est, dicitur: *Quod Prussiam Brandeburgicam Jure Supremi Domini sibi habere & eam cum Summa absolutaque potestate*

re-



*regere debeat* &c. consequitur, eam in Dominio & patrimonio alieno esse non posse; Rem etenim aliquam Jure Supremi Domini sibi habere, nihil aliud est aut significat, quam esse Ejusdem Domini aut Proprietarii; quamvis ista proprietas ac Dominium existente certo casu tollatur & ad alium devolvatur, quod tamen, antequam casus ille accidat, proprietati ac Dominio Ejus ad quem istud tantisper pertinet, ne hilum quidem derogare aut detrahere potest.

Pactis equidem Bydgosstiensibus hæc verba inserta sunt:

*Quod ex tradito à Republica Polonia, Electori Friderico V Vilhelmo ejusque Descendentibus, absoluto Dominio, non sequatur perpetua feudi alienatio.*

Nec id à quoquam negatur, Interim ex eo pronâ, justâque interpretatione necessario sequitur, factam esse Pactis Bydgosstiensibus alienationem feudi temporariam, quâ videlicet nexus feudalis & ex eo oriunda dependentia, quamdiu Electoris Friderici Wilhelmi posteritas mascula superstes erit, sunt abolita, adeo ut nonnisi extincta istâ posteritate debeant reviviscere, & hoc est, quod à Domo Brandenburgica tantummodo urgetur, quippe quæ saltem ad id usque tempus quo Friderici Wilhelmi Descendentes masculi existabunt, summam absolutamque in Prussiam Brandenburgicam potestatem ex clara æterni fœderis dispositione, adeoque jure optimo sibi vindicat & adferit.

Quod si ergo hæc omnia immoto fundamento nituntur, sicuti per hætenus dicta & deducta evidentissimè est Demonstratum, sique Electoris Friderici Wilhelmi posteritas, quamdiu eam durare propitia fata siverint, Prussiam Brandenburgicam cum summa absolutaq; potestate possidet ac regit, consequens est, ut Ei quoque liceat titulum Ducis Supremi, quo hætenus Prussiam suam complexa fuit, in Nomen ac Titulum Regis mutare, eumque Titulum Regium ab Aliis sibi datum atque oblatum acceptare; Siquidem

1. Hæc agendi libertas & facultas intradito per Pacta Bydgosstiensia Supremo Dominio Summaque ac absoluta potestate simul comprehensa est, &c. Quæ enim quæso, plena, summa, absolutaque potestas ea esset, quæ facultate novos honores sibi adrogandi, & ab aliis oblatos acceptandi sit destituta? Meritò sanè censendum est, ista verborum emphasi contineri omnes actus, quoscunq; unquam Princeps summus ac independens in suis terris exercuit, qui quidem nec in sese injusti quicquam habeant, nec juribus aliorum quæsitis ullo modo derogent; quorum utrumque de assumpta in Prussia Regali Dignitate dici nulla ratione potest.

Quod



Quod verò temporibus tam antiquioribus quàm nuperis hi, qui in Regione aliqua Supremum Dominium cum summa absolutaque potestate habuerunt, Domini, Ducis Comitis vel alio ejusmodi titulo, propria autoritate, proque suo lubitu deposito, illius loco Reges sese nominaverint, Regiumque Diadema sibi imposuerint, omnibus, qui historiarum non prorsus sunt expertes, constat.

Quamvis enim ex aliquot Seculis Imperatores, horumque exemplo Pontifices Romani, certum quoddam jus appellandi Reges sibi arrogaverunt multa tamen extant exempla diversorum Principum, qui etiam ab isto tempore, nullâ Imperatoris vel Pontificis Romani autoritate, sed virtute tantum Supremi in Terras suas Imperii ac summæ absolutæque potestatis sumto Regio titulo, coronari sese fecerunt. Castilia, Portugallia & exigua Algarbiæ Regio, Arragonia etiam, hac ratione à Comitibus Regna fuere facta, & qui in illis Terris rerum potiebantur, Ipsi sese, non adminiculante aliorum autoritate, solius summæ potestatis sibi competentis vi, in Regiam Dignitatem evexere: De Hybernia notum est, eam ante sesqui seculum adhuc Dominium Hyberniæ fuisse dictum, quo Titulo deinde Rex Angliæ Henricus II. propria autoritate mutato, Regem Hyberniæ sese appellavit, nullo alio jure: quam vi competentis sibi in istam Insulam Supremi Domini & absolutæ, Summæque potestatis, quibus omnibus Domus Electoralis Brandenburgica perinde ac simili prorsus modo ac mensura in Prussiam suam gaudet.

Et quo tandem jure, quoque prætextu sustineat quisquam Supremo absolutæque Potestatis Principi obniti, quò minus novum titulum Jure adsumat & ab aliis summæ potestatis Principibus sibi ultrò oblatum & quo Ipsi Eum judicare dignum admittat, eoque utatur? Cum ergò diversi Potentissimi, Maximique Europæ Reges, Electores & Principes intra & extra Imperium Romanum, diversæ liberæ potentesque Respublicæ, & qui primo loco nominandus erat, Imperator Ipse, qui gloriosissimorum suorum Antecessorum exemplo, nec sine fundamento, circa jus renunciandi Reges sibi prærogativam aliquam sumit, ultrò declaraverint atque obtulerint sese Electorem Brandenburgicum deinceps pro Rege habituros ac agnituros omnesque cum ejusmodi Dignitate connexos honores pari cum reliquis Europæ Regibus ratione, non habito ullo inter Illos, Ipsumque discrimine, exhibituros, tum Legationibus solennibus re ipsa exhibeant, Ipsius Legationes suis in aulis ceu Regias recipiant atque colant, nec præterea ulla in re cum Eo aliter, quam cum reliquis Regibus Europæis agant, sicut hoc toti Terrarum Orbi nunc certum est ac exploratum. Quâ quæso æqui justive specie quisquam hisce obni-



modolibet interesse potest: Cum Regium Diadema, quo olim Prusiae hujus Nostrae Domini decorabantur, nuper postliminiò quasi Nobis re impositum sit, & inter ceteros Europae Reges, Regiae huic Nostrae Dignitati applaudentes, Serenissimus & Potentissimus Poloniae Rex, Frater noster charissimus, facta Eidem eà de re notificatione, non per literas tantum, sed per suum quoq; ad Nos Ablegatum Extraordinarium, Illustrem & Magnificum Comitem Towiansky, Supremum Regni Pocillatorem, Nos pro Rege agnoverit & honores dignitati huic nostrae debitos exhiberi Nobis fecerit, Nos cupientes omnem scrupulum sinistrasq; opiniones, quae Inclytae Reipublicae, propter Regium, quem nunc adepti sumus Titulum forsan moveri possent, optimo plenissimoque, quo id fieri potest modo tollere & sub movere, eum in finem non tantum Reg. S. Majestati certas extradiderimus literas Reversales tenoris sequentis:

Sequitur Affecuratio jam supra inserta:

**S**ED pro majori etiam praelaudatae Reipublicae Securitate denuò promittendum Eidem duxerimus, prout hisce fide, verboque nostro Regio pro Haeredibus Successoribusque Nostris futuris in Prussia Regibus spondemus & promittimus, Nos non tantum ea quae praedictis literis Reversalibus, quarum novum exemplar omni quo id desiderabitur tempore Reipublicae exhibebimus, continentur, Sanctè Servaturos, & Regia, quâ nunc gaudemus Dignitate, nunquam & sub nullo praetextu ita usuros esse, ut exinde quicquam quod Reipublicae damnosum, pactis, quae Eandem inter & Nos intercedunt, contrarium, aut ad praesentem Reipublicae Statum ullatenus immutandum, juraque Ejus imminuenda pertinet, provenire possit, Quin potius si hæc  
Decla-



*Declaratio Nostra cuiuspiam hanc sufficiens videatur, de  
majore etiam securitate, Inclytæ Reipublicæ circa hanc  
Dignitatem Nostram præstanda, cum Eadem eo modo,  
iisq; conditionibus conventuros esse, ut exinde novum  
arctiusq; bonæ vicinitatis amicitiae, mutuæq; salutis in-  
vicem procurandæ vinculum stimulusq; exsurgat. In  
quorum omnium fidem. Dab. Regiomonti die 21. Feb.  
1701.*

Neque verò Titulus Regis Prussiæ, quo Elector Brandeburgicus jam claret, eam vim eumque effectum habere potest ut isto jus in Prussia Brandenburgica succedendi, quod in casum caducitatis Regno Poloniæ reservatum est, non dicam, tollatur, sed ne minima quidem ratione imminuatur aut infringatur.

Ubi enim gentium reperietur Regnum in quo Successiones non sint in certos casus ad certas pactorum regulas restrictæ? quâ nimirum ratione à Familia in Familiam, vel à Natione in Nationem debeant devolvi, eadem ratione, qua Successioni in Prussia Brandenburgica per Leges Pactorum Bydgostiensium inter Poloniam & Domum Brandenburgicam, inviolabilis modus præscriptus est.

In Regno Angliæ eo tempore, quo præsens Rex Wilhelmus in solium subvehebatur, constitutum est, ut si Illi, ex Coniuge Maria, quam tunc habebat, nulli nascerentur Hæredes, hujus soror succederet, & Regis proles, quam forsan ex alio Coniugio suscepturus esset, Sorori Reginæ, Principissæ Annæ Ejusque Descendentibus in Successione post haberetur. Et jam quoque Electrix Brunsvicensis Vidua denominata est, quæ Principissæ Annæ, si contingat Eam ut & Regem Guilielmum sine liberis vita excedere, in Sceptri Hæreditare succedat.

Quis autem Præsenti Angliæ Regi ideò Regni possessionem labefactare, vel hanc causam, cur Ille Rex vocari nequeat, allegare audeat, quod post ipsius mortem Regnum Magnæ Britanniae in aliam quam suam familiam, atque adeo, si ita casum fata dispensent, ab Anglica ad Germanicam Nationem sit transiturum?

Regna, quorum supra mentionem fecimus Neapolis & Siciliae, ut constat, sunt Feuda Sedis Romanæ. Si ergo accideret ut Ista familia, quæ illa hætenus à Sede Pontificia in Feudum recognovit, planè extingueretur, futurum esset ut illa Regna, possessore clientelari vacua, ad Ecclesiam Romanam reciderent. Neque tamen ex hacce ratione Pontifex aut alius quispiam Regum, Principum aut

D

Rerum,



Rerumpublicarum Regibus Hispaniæ, qui Regnum istud hætenus possedere, titulum Regalem unquam reddidit dubium.

Quod si ergo Titulus ejusmodi Regalis potest dari, reque ipsa datus est, ejusmodi Principi, qui in præsentiarum Vassallagii nomine alii est obnoxius, idque vel ab ipso Domino suo Beneficiario, multò minori certe jure ac æquitate Titulus Regis oppugnari aut in dubium vocari potest in eo Principe, qui Terras suas cum summa absolutaque potestate, ceu Pacta Bydgostiensia loquuntur, regit & quæ Terræ tantum certo, inque sinu Dei recumbente casu, hoc est post extinctam Electoris Friderici Wilhelmi Posteritatem, quod quidem an & quando eventurum sit valdè incertum ad Feudi naturam redituræ sunt Adhuc semel repetitur, Novum Regis Prussiæ Titulum, Domui Electorali Brandenburgicæ, si vicinos, ac præsertim si Regnum Poloniæ respicias, ne tantillum quidem amplioris juris, potestatis, autoritatisque afferre, quam illa antea secundum Pacta Bydgostiensia habuit adeoque fore non tantum injustum sed ridiculum etiam atque impium, si Is, qui Prussiæ Brandenburgicæ Regis titulo sive nunc præest, sive olim imperitabit, nomen Regium cupiditati suæ vel latum pedem Prussiæ Polonicæ ad sese pertrahendi, prætexat.

Distinctio illa quæ Prussia Polonica ac Brandenburgica sejunguntur futuro tempore perennabit perinde atque illa hætenus fuit, Prussia Polonica manet & manebit annexa Poloniæ, Brandenburgica verò Domui Brandenburgicæ, quamdiu Pacta Bydgostiensia eandem huic tantquam propriam attribuunt. Regnum Poloniæ retinet suum, quod habet, jus, certo casu in Prussia Brandenburgica succedendi; Contra verò Domus Brandenburgica ejusmodi jus in Prussia Polonica succedendi, ne minimam quidem specie sibi potest vindicare, Eosdem fines, qui Prussiam Polonicam à Brandenburgica hætenus diremerunt, manere etiam impofterum necesse est, Domus Electoralis Brandenburgica ante acceptatam dignitatem Regalem ne vel animo quidem cogitatum jus in Prussiam Polonicam habuit, nec adoptatam Dignitatem Regali quicquam ejusmodi in illam est adepta, quod nec sibi expetit, quærit aut affectat, quin potius agnoscit, sibi vigore patrum Bydgostiensium incumbere, ut ad conservandam libertatem Jura ac Privilegia totius Poloniæ, Prussiæque Polonicæ omnem quam potest, curam, studium & diligentiam conferat.

Consideretur & expendatur quæso, Titulos Imperatoris, Regis, Electoris Principis, Ducis, Marchionis, Comitis & Domini meros esse Titulos honoris, perque illos ne in eam quidem regionem in qua Supremus Magistratus ejusmodi nomine effulget, multò vero minus in Ipsius Vicinos & externos, certam quandam potestatis aut jurisdictionis speciem significari aut acquiri. In Populo Romano sæpè



sæpè emersêre Magistratus, qui sub nudo Principis nomine veros sese præstiterè Tyrannos & alibi Reges eluxêre, qui veri Patriæ Patres fuerunt, Præsentibus quoque temporibus reperiuntur Reges qui in suis Ditionibus ne tantâ quidem potestate, quantâ alibi vel Comes in suo Comitatu pollent:

Quare ergo nomen Regium in Domo Brandenburgica adeò censetur formidandum? & quas ob causas isto audito deflectuntur animi in nescio, quas suspiciones, opinionesque sinisteriores? præsertim cum Is, qui in Ista Domò hocce Titulo decoratur, ex eodem, uti supra dictum est, tantum novos quosdam honores, minimè vero novam aliquam aut ampliorem potestatem ne in suos quidem subditos, ne dum in Vicinos expetir ac sibi accommodat.

Omnibus mortalibus iste affectus congenitus laudeque dignus est habendus, ut suam quisque suæque familiæ conditionem ac Statum lautiorè, splendidiorèq; reddere satagat, Exempla aliorum Principum qui prius tenues titulos gessere ac postea Dignitatem Regalem Domibus suis intulêre, nunquam eam ob causam sunt reprehensa.

Quis est Nationis Polonicæ qui non nitatur sibi suisque insigniorem Honorem ac Dignitatem adstruere? Nonne hæc indoles animos erectos atque nobiles à reliquis secernit? Et cui in acceptis referet suam præ plebe prærogativam Nobilitas Polonica, nisi curæ isti, qua majores illorum cupidè elaboraverunt, ut sese ab infimæ sortis hominibus segregarent, inque altiorè honore gradum ascenderent. Quo autem jure in Electore Brandenburgico vituperabitur illa generosioris animi indoles, quæ in Aliis habetur bona ac laudabilis, & in qua Imperatorem totque alios Europæ Reges, Principes & Potestates habuit applaudentes? præsertim cum, quod supra demonstratum est, ista cum nullius mortalium injuria aut molestia sit conjuncta concessis etiam sibi à Deo opibus quibus Regalem Statum debito decore ac splendore sustinere ac ornare possit.

Nec offendere quendam debet titulus ille: REGIS PRUSSIÆ ac si Elector per Eundem Prussiæ totius, ac inprimis etiam Polonicæ cupiat esse Dominus &c. Minimè id verò &c. Quæ enim superius scripto huic intertextæ sunt Declarationes, clarè perspicueque testantur, non fovere Regiam S.<sup>m</sup> Maj.<sup>tem</sup> hanc animo sententiam; Præterea id se invicem minimè consequitur ut Is qui sibi titulum alicujus regionis adaptat, velit esse totius Regionis Dominus solitarius, exclusis etiam aliis, qui jure sibi aliquam ejusdem partem vindicant.

Reges Galliæ atque Hispaniæ utrinque utuntur titulo Regum Navar-



Navarra, licet uterque certam tantum Regni Navarra portionem possideat, nec alter in alterius partem jus ullum sibi vindicet.

Reges Sueciae ac Daniae ultro citroque se Regum Vandaliae titulo appellant, Elector Brandenburgicus & Duces Megapolitani ex utraque parte Duces Vandaliae dicuntur: nec tamen ideo ullus horum Principum metuit, ne reliqui, qui secum Titulum huncce usurpant, se à jure sibi in istud Regnum, Ducatumve Vandaliae competente excludere velint; Imò in ipsa Polonia reperire est quosdam Magnates, qui titulum Principis Sacri Romani Imperii gerunt, quam tamen ob causam credibile non est, quenquam Eorum potestatem in totum Romanum Imperium sibi arrogare velle, ut silentio praeterea Reges quoque ipsos Poloniae, insignioresque Reipublicae Proceres Ducibus Prussiae, istis quoque temporibus, quibus ista Regio Vasallagio Polonico subfuit Titulum Dux Prussiae & Dux in Prussia promiscue dedisse, probe gnaros, non in hoc esse situm rei momentum, nec Ducem ex tota Regione ideo sibi plus, quam pacta ipsi tribuunt, vindicare posse, sive isto, sive alio alloquio compellaretur.

Spes certa est fore ut nobilis Polonorum Natio, cujus prudentia, insigne ingenii acumen, & aequitas praeter aliis gentibus orbi inclaruit, ex iis, quae hactenus dicta sunt, facile perspiciat atque cognoscat, sollicitudinem, qua illa visa est ex acceptato ab Electore Brandenburgico Regio Titulo perturbari, inane esse, omnemque mutationem, quae in Regnum Poloniae inde possit redundare, in hoc solo consistere quod Prussia Brandenburgica alias sub Titulo Ducatus, si Electoris Friderici Wilhelmi Posteritatem masculam desinere contingat, ad Poloniam reditura, nunc Regni titulo ornata in ipsius sinum tali casu sit revolvenda.

Quod si tamen contra omnem spem adhuc aliquid dubitationis in Nationis Polonicae animis maneat reliquum, nulla est ex Regiae Suae Majestatis Prussicae parte mora, quin ab utrinque Delegatis quantocyus amicabile instituat colloquium perceptisque quae Polonia desideret aut expetat, ulterius ejusmodi proferatur Declaratio & securitatis praestatio, ut totus orbis, atque adeo vel illi ipsi qui ex hoc negotio, nescio quid sinistri extorquere aut privati sui commodi studio Poloniam ac Domum Brandenburgicam excitata inter illos diffidentia disjungere allaborent, convincantur, nova hacce Dignitate à parte Regis Prussiae nihil plane quaesitum, quod ad praerudicium aut detrimentum Poloniae referri possit, sed Majestatem suam in Pactis Bydgosstiensibus per singula illorum capita sanctè atque inviolabiliter perstituram, ea, quae Pacta saepius laudata Regno Poloniae asserunt, illibata reliaturam, eamque fidem, si quidem id necessitas videatur exigere, novo quodam vinculo, quantacunque id firmitatis atque valoris in societate humana potest excogitari, roboraturam, atque praeterea generosae hujus Nationis emolumenta, libertatem, florem ac incrementum, omnibus à Deo sibi concessis viribus istuc conversis ac impensis quaesituram atque promoturam esse &c.









